

雜病論精義折中

下

中華民國

甲戌子歲
冬月初
再版

全函兩部共四卷

售價國幣陸圓
外寄不加郵費

著者
發行所

豫州桐柏山
原籍婺源
朱壺山
北平西華北國醫學院
大藤線胡同

北平琉璃廠市
佩文齋
西平琉璃廠市

北平琉璃廠市
直隸書局
東平琉璃廠市

北平西華北國醫學院
壺山醫廬
成方街二號

北平西華北國醫學院
時鐸堂藥店
北平市口

北平市
佩文齋各支店

印刷所

北平宣武門外
潘家河沿十二號
實業印刷商行

有著作權
必究

最新雜病論精義折中卷下

豫州朱 萐壺山氏著

受業桐柏

王學曾
鄭明柄

漢陽劉裕環
天津楊培基
校字

消渴小便不利淋病脈證治第十三

消渴

消渴總綱

厥陰之爲病、消渴、氣上衝心、心中痛熱、飢、而不欲食、食則吐、下之不肯止、按厥陰爲風木之臟。木鬱火燔。得風之助。灼耗津液。求助於水。故渴。火甚水入不足以制火。水反爲火所消。而仍欲得水。故曰消渴。肝木本生心火。而風氣有餘。反上衝心。肝木橫恣故心痛。風火太甚故心熱。心熱循絡入胃。消化之力過大故飢。風熱太過。土被木刑。胃氣反傷。雖飢而仍不欲食。強食、則隨肝氣上衝而作吐。若照陽明燥熱之例而下之何如。風火向上。徒傷胃液。無力上行其濡潤。其渴仍不肯止。風氣未平。欲罷渴而不能也。此時以清潤木火。爲無上治法。萬勿視同厥陰傷寒。食則吐衄之寒症。誤用烏梅丸治之焉。況厥陰肝木。上合心包。又附膽火。風鬱火燔。

則病消渴。何嘗是寒。以消渴論。後人雖有上消中消下消之分。而其病總屬於厥陰。內經風消二字。消必兼風言。亦是此意。勿因上消是心移熱於肺。係在太陰。中消是火燔土燥。係在陽明。下消是水虛不能制火。火虛不能化水。係在少陰。俱不言及厥陰。認爲與厥陰無關。蓋厥陰橫之爲病。則太陰受之。厥陰縱之爲病。則陽明受之。肝木上生心火。下連腎水。是厥陰上下爲病。則少陰受之。由是推之、三消之症。何能離此。

上消中消症

寸口脈浮而遲、浮卽爲虛、遲卽爲勞、虛則衛氣不足、勞則營氣竭、趺陽脈浮而數、浮卽爲氣、數卽消穀而大堅、氣盛則洩數、洩數則堅、堅數相搏、卽爲消渴、

陳長樂曰。此節以寸口診營衛。上消之症含於其中。趺陽診陽明。中消之症詳而不漏。二症實相因而起也。何哉。蓋寸口脈浮而遲。浮非表也。乃氣不斂而爲虛。遲非寒也。乃營不充而爲勞。氣既不斂而虛。則衛行脈外之氣不足。營既不充而勞。則營行脈中之氣亦竭。心爲營。肺爲衛。肺氣不充。寒熱皆受。心火不足。必移寒於肺爲肺

消。炙甘草湯、或柴胡桂薑湯、加人參五味麥冬皆可用。心虛火盛。移熱於肺爲膈消。喻嘉言用竹葉石膏湯。去半夏加花粉。或不去半夏。最得其秘。夫營衛之氣。皆關水穀之精。寸口脈浮而遲。乃水穀之精氣。不能上充心肺所致。不上充必內鬱。則胃熱生矣。跌陽胃脈也。當然變浮遲爲浮數。浮卽爲氣虛。經曰熱氣蒸胸中是也。數卽爲氣盛。李士材曰、氣有餘便是火。火盛則消穀而大堅。堅則水不能入。如以水投石。水去而石自若也。且氣之盛卽火之盛。火盛本足消水。水入本足解渴。今胃中堅燥。全不受水之浸潤。轉從火熱之勢。急奔膀胱則洩數。洩數則堅。愈數愈堅。愈堅愈數。堅數相搏。卽爲消渴。此中消病責在二陽。以人參白虎湯。送下脾約丸。（麻仁大黃厚樸枳實芍藥杏仁）頗妙。然須隨症變通。不可膠柱也。

下消症

男子消渴、小便反多、以飲一斗小便亦一斗、腎氣丸主之、

按上消者、水消於上。飲水多而小便少也。中消者、食消於中。穀食多而大便堅也。下消者、水消於下。飲水多而小便亦多也。陳氏曰、上中二消屬熱。下消則兼寒熱。

以腎爲水火之臟也。此節提出男子二字。明指房勞傷腎。小便反多。飲一斗泄一斗者、腎爲水臟。中涵命門之火。在下蒸水化氣。上達心肺則爲津液。以養金濡火。是以不渴。今命門火衰。是腎中一陽不振。不能蒸水化氣。以滋潤上焦。是以發渴多飲。所飲之水。中無火化。是以直趨膀胱。小便反多。飲一斗泄一斗矣。腎氣丸用桂附以振作水中頽落之陽。發越命門之火。火交於水。卽化爲氣以達上焦。上焦之津液足。則飲水少而小便亦少矣。否則滋陰潤燥之品。同於飲水無濟。但益下趨之勢而已。

乾地黃 生山藥 山萸肉 茯苓 澤瀉 桂枝 附子 丹皮

趙養葵曰、君子觀象於坎。知腎中眞水火之用。今人入房而陽事易舉者。陰虛火動也。陽事先痿者。命門火衰也。眞水竭則隆冬不寒。眞火熄則盛夏不熱。地黃山藥澤瀉丹皮山萸、皆濡潤之品。所以能壯水之主。桂枝、附子、辛潤之物。能於水中補火。所以益火之源。水火得其養。則腎氣復矣。

似消渴

141

脈浮、小便不利、微熱消渴、宜利小便發汗、五苓散主之、

澤瀉 豬苓 茯苓 白朮 桂枝

右五味爲末、白飲服方寸匕、日三服、多飲煖水、汗出愈、

按太陽傷寒。重則用麻黃湯。輕則用五苓散。坎中一陽之氣衰。不足出而衛外爲固。

則外寒得入皮膚。太陽主通身之皮膚。故脈浮。坎陽衰、則寒邪得由太陽之經入膀胱。凝結寒水。不能化氣上行。以生津液而潤心肺。火炎金燥。不能不急於求水以自救。則病消渴。氣不化則不下出。故小便不利。經曰膀胱者、州都之官。津液藏焉。氣化則出。觀此益了然也。外之寒邪不解。太陽之氣、鬱於肌膚之間。不得外達而急欲外達。故發熱。論表症則太陽之氣。不足以禦外寒。故用桂枝下助腎陽。以蒸水化氣。通津液以滋周身。輸津液以濡心肺。則消渴之症解。多飲煖水以出汗。則陽隨汗出。外寒除而微熱亦退。脈亦不浮。論裏症則三焦之氣化不宣。用桂枝引心陽以下濟腎陽。命門之火力壯。斯膀胱之氣化足。又得二苓澤朮。徹上徹下。以通三焦之閉塞。而利決瀆之水道。不用通膀胱溺竅之藥。而小便自利。此所謂氣化則能出矣。再觀小便不利。汗出而渴。主五苓散。不渴者、主茯苓甘草湯云云。益證明渴爲陽氣不足。

不能蒸水化氣。故用桂枝。不渴則腎陽尚能化氣。故不用桂枝。是五苓散爲治三焦之劑。不專治太陽。麻黃湯爲太陽之專劑。兼治三焦。一輕一重。一太一少。主治判然。若解爲熱入膀胱。阻滯氣化。用五苓散以化氣。然正氣被傷。津液暗涸。又用桂朮以助邪。用苓澤以滲溼。是熱甚則邪益盛。滲甚則津益枯。速之死矣。

非消渴症一

148

渴欲飲水、水入則吐者、名曰水逆、五苓散主之、

按此係心陽不振。脾胃溼寒之病。心爲太陽。如日灼中天。溫暖下土。今則心陽不振。脾胃溼寒。脾過溼不能輸津於肺。金燥津枯。勢必發渴。渴則飲水過多。胃寒無力。將水散出。胃有寒飲。新入之水。刻不相容。故入口則吐。名曰水逆。非胃熱上逆也。胃熱上逆。則嘔吐不止矣。方用桂枝以振心陽。心陽下濟。中土溫暖。又得白朮以助胃燥。燥則能散飲入之水。何至上逆。二苓以滲脾溼。溼不甚尚能輸津潤肺。又得澤瀉生於水者、通三焦之膜。以引水下趨膀胱。桂枝又引心陽以下溫腎水。蒸水化氣。渴止而水逆之病亦除。然不得謂爲消渴者。以消渴無水逆之患也。

非消渴症二

149

渴欲飲水不止者、文蛤散主之、

文蛤五兩、杵爲散、以沸湯五合、和服方寸匕、

按此係太陰溼氣不足。致脾胃乾燥如焚。飲水不能止其燥熱者。文蛤海物鹹寒。育陰潤燥。除熱利水。皆其能事。爲散以制此症。庶燥熱除。陰液生。小便利。渴止。而多飲之水。亦不至留爲患矣。此與傷寒論文蛤散症不同。彼是水與熱激在肌肉間。外不能隨汗出。內不能隨溺出。故肉上粟起而不渴。文蛤能清利溼熱。除水氣以利小便。使肌肉間病邪、從小便出。且取殼上疙瘩。象形治之也。

附論一

200

聖濟總錄論消渴。以渴則飲水必多。小便中有脂似麩而甘。病實起於中焦。因中焦脾病累及於脾。脾爲脾之副臟。難經所謂脾有散膏半觔是也。有時脾臟發酵。多釀甜味。由水道下陷。小便卽含有糖質。迨至脾病累及於脾。脾卽不能散津達肺。則津液少。不能通調水道。則小便無節。是以渴而多飲多洩。張鹽山以黃耆爲君。佐葛根以升

肝脾之清陽。臣以山藥知母花粉、以大滋真陰。陽升陰應。自有雲行雨施之妙。醫者又參照八味丸用茯苓人參以去脾中之溼寒。用桂枝附子以救真火之衰微。乾地黃以助腎陰之滋長。足以上潮潤肺。挾山萸肉或五味。以止疏泄而固腎關。又用生麥芽、玄明粉。以舒肝氣而去燥滯。中醫主氣化。所論亦極有理。

附論二

盧氏抑甫談糖尿一證。在西醫病理上之研究。由於胰腺之島。組織萎縮。製造內分泌物之機能減卻。故對於副臟之內分泌物之亞篤列那林。助肝臟造糖之過甚。技能不能制止。因而血液內含糖量過多。以致尿內亦含有糖質。西醫初起無適當之治法。西曆一千九百二十年、西醫邦廷古氏、由牛馬豕等之胰腺、抽出其內分泌物、名之曰依蘇林。注射於皮下或靜脈內。能使血內過量之糖。立即減少。雖至病劇陷於昏睡時。亦有起死回生之望。中國古法有用生豬胰一味。治糖尿病。只知以胰腺補胰腺。而不知實其內分泌物之作用。又言內服之法。不如注射。經口入胃。其有效成分。多爲酸性胃液所破壞。奏效不易。如能除去豬胰之脂肪結締織。及蛋白酵素。製成水液流膏。

使僅含有抗糖物質。再加鹼性液。以防制胃液之酸性。則內服之缺點。可以免去。又日本上條秀介、於中藥何首烏。抽出一種有效成分。名曰巴利夠寧。治糖尿病、卻能減少糖質。我國醫家、如能於黃耆湯、八味丸、抽出某藥成分。證明有減少糖質之作用。東西醫不能專美於前矣。西醫科學化。持論當然有據。

附論三

傷寒論厥陰提綱、有消渴症。屬肝病。聖濟錄言脾臟發酵。多釀甜味。累及於脾。由水道下陷。當然經過肝臟。累及於肝。與盧氏言脾臟之島。組織萎縮。不能制止助肝臟造糖之過甚。血液內有糖質。因之尿內亦含有糖質。其大旨亦無甚懸殊。用中藥治此病。只知從脾臟著眼。遺卻肝臟。無論理論如何。不易收效。一方主生豬胰三錢。生豬膽皮一錢。切碎開水衝服。早晚各一次。一方主黃耆知母杭芍花粉茯苓白頭翁末之。開水衝服、一錢。日三次。合脾脾肝三臟而統治之。從氣化血液仍何方面觀察。皆能通過。若以爲未足。再參以附論一主氣化之治方。蓋肝爲風臟。設無風木煽動。無論如何火熱。斷無不受水潤之理。細玩內經風消二字。自知治方。高士宗認爲肝病

。良有以也。

淋

淋之病狀

201

淋之爲病、小便如粟狀、小腹絃急、痛引臍中、按淋之爲病。出於溺道者。必不覺痛楚。以病不關血分則不痛。間有出於精道者。則必痛。以精者、成於血與氣也。而何以出自溺道。大抵是心遺熱於小腸。臍者小腸之蒂也。何以出自精道。大抵是肝遺熱於血室。血室、居小腹之中也。小腸與膀胱同屬太陽經。肝司膀胱之疎泄。皆一膜相連。而膜原出於腎閒動氣。陰不虛不生熱。而肝又行腎氣。肝熱則腎必熱。是肝腎皆屬陰虛無疑。腎虛生熱。蟄藏不固。精氣必易滑脫。蒸熱膀胱。小便改其常度。肝亦因虛熱滯其疎泄。是以小便短而且數。而敗精被虛熱煨煉。是以尿出如粟米狀。肝氣亦因疎泄阻滯。鬱於小腹。故小腹絃急。小腸引心血下入血室。亦不能毫無阻滯。寧靜如常。是以痛引臍中。

淋因胃熱下注

202

跌陽脈數、胃中有熱、卽消穀引飲、大便必堅、小便則數、

陳長樂曰、淋病爲下焦之熱。而下焦本於中焦。跌陽者胃也。跌陽脈數。胃中有熱。卽消穀引飲。大便必堅。小便則數。數而無度。莖中不痛。是熱氣燥灼。消渴之漸也。頻數而短。莖中作痛。熱氣下注。淋病之根也。或謂淋與消渴。異病同源。誠然。

淋家忌發汗

203

淋家不可發汗、發汗則便血、

按血室居膀胱之後。只隔一層。而息息相通。淋家虛熱在下。久熬陰液。陰液已傷。急待滋養。豈可發汗傷而又傷。若發汗則水府告罄。熱逼於下。血室之血。必被蒸發。透膜妄行。從小便出矣。

附淋類十

204

一血淋

(甲)屬於熱者

生山藥 一兩 生龍骨 生牡蠣 各六錢 海螵蛸 四錢 茜草 二錢 生杭芍 三錢

白頭翁 三錢 眞阿膠 不炒三錢

肝膽熱者加龍膽草二錢、大便下血者、去阿膠、加龍眼肉五錢、

此鹽山理血湯。兼治溺血、大便下血症、之屬於熱者也。溺血之症。大抵出自精道。其人或縱欲太過。失於調攝。腎臟因虛生熱。或慾甚強制。相火動無所泄。亦多生熱。以致血室中血熱妄動。與敗精溷合。化爲腐濁之物。紅白相間。成絲成塊。溺時杜塞牽引作痛。故用山藥阿膠以補腎臟之虛。白頭翁以清下注之熱。升下陷之氣。茜草海螵蛸、化其凝滯。兼能固其滑脫。龍骨牡蠣、固其滑脫、兼能化其凝滯。芍藥以利小便。兼能滋陰清熱。用意亦極周到。著者用之屢效。若遇脈絃而滯。其人因忿怒致肝火下鬱者。卽將白頭翁加重。再加柏子仁以鎮肝養肝也。千金有石葦散治血淋。係石葦、當歸、蒲黃、芍藥、四味等分爲散。酒服方寸匕。日三服。存參。

(乙)屬於寒者

溺血之症。熱者居多。而間有因寒者。此方不可用矣。其人陡然溺血。脈微弱而遲。自覺下焦寒涼。知其中氣虛弱。不能攝血。又兼命門火衰。乏收攝之力。以致腎臟不

能封固。血隨小便脫出也。用四君子湯、加熟地烏附子、

(丙)屬於不寒不熱者

脾虛不能統血而溺血。太陰之不升也。仍用四君子湯。以龍骨牡蠣佐之。

二膏淋

生山藥一兩

生芡實六錢

生龍骨

生牡蠣各六錢

大生地六錢

生杭芍三錢

潞黨參三錢

淋有肥狀似膏、曰膏淋。一曰肉淋。此腎虛不能制節肥液。故肥液與小便俱出。夫既曰腎虛。必然腎臟虧損。蟄藏不固。精氣易於滑脫。暗生之內熱。當然熏蒸膀胱。改其常度。久之三焦之氣化。滯其升降之機。遂至便時牽引作痛。溷濁稠黏。鹽山用山藥芡實以補虛。而兼有收瀉之意。龍骨牡蠣以固脫。而兼有化滯之功。地黃芍藥以清熱利便。黨參以總提其氣化而斡旋之。若其症兼溷濁而不稠黏。是但出自溺道。宜將龍骨牡蠣減半。癸酉春柯道初庶常患此症。脈絃清陽下陷。又不勝人參之補。著者易以柴胡三錢。數劑而痊。

三氣淋

生黃耆 五錢 知母 四錢 生杭芍 三錢 柴胡 二錢 生明乳香 生明沒藥 各一錢

氣淋之症。少腹常常下墜作疼。小便頻數。淋瀝滯痛。因其人下焦本虛。素蘊內熱。而上焦之氣化又復下陷。鬱而生熱。是虛熱與溼熱。互結於太陽之腑。滯其升降流通之機。而氣淋之症成矣。鹽山以升補氣化爲主。以滋陰利便。流通氣化之藥佐之。著者用此方、加玄參茯苓。以清虛熱而泄溼熱。甚效。

四勞淋

生山藥 一兩 生芡實 三錢 知母 三錢 東阿膠 三錢不炒 生杭芍 三錢

勞淋之症。因勞而成。或勞力過度。或勞心過度。或房勞過度。皆能暗生內熱。灼耗真陰。陰虧熱熾。熏蒸膀胱。久而成淋。小便不能稍忍。便後仍欲復便。常常作痛。鹽山用滋補真陰之藥爲主。加利小便之藥爲向導者此也。然此症由勞力得者易治。由勞心得者難治。由房勞得者更難治。又有思慾無窮。相火暗動而無所洩。積久而成淋者。宜用黃柏知母以涼腎。澤瀉滑石以泄腎。君用山藥者、陰虛小便不利。山藥可利

小便。氣虛小便不攝。山藥可攝小便。以山藥爲滋陰之良藥。又爲固腎氣之良藥。治淋症之淋漓頻數。誠有一無二之聖品。

五砂淋

黃色生雞內金一兩去淨沙石

生黃耆 八錢

知母 八錢

芍藥 六錢

礪砂 六錢

朴硝

五錢在上者爲芒硝在底者爲朴硝

硝石

五錢一名火硝又名焰硝

右七味末之、煉蜜丸梧子大、食前開水送服三錢、日二服、此鹽山所製也、

按腎主水。水結則化爲石。故名石淋。一名砂淋。症起於三焦瘀滯。或勞心力過度。

氣分虧損。肺虛生熱。下輸膀胱。或年老腎虛生熱。移熱膀胱。其熱與瘀滯熬煎。久

而結成砂石。杜塞溺道。痛楚異常。其結之小者、以藥化之。若大如桃杏核以上。舍

西人破取之法。別無救濟。豫州唐河縣牛書農太守。患此症半載。來北平就醫於余。

診其脈浮絃而數。不任重按。知其腎虛不能納氣。陰虛不能潛陽。熱蒸膀胱。循膜上

升。肺氣瘀滯不能下行。水源不清。三焦爲濁。煎熬既久。砂淋卽成。日夜數十次。

七旬老人。何能受此痛楚。方用生地黃育陰以消腎熱。生百合補肺以清水源。則砂淋